



CONVENIO DE COLABORACIÓN ENTRE O ORGANISMO AUTÓNOMO INSTITUTO DE ESTUDOS DO TERRITORIO DA CONSELLERÍA DE MEDIO AMBIENTE, TERRITORIO E VIVENDA E O CONCELLO DE ARTEIXO PARA A COLABORACIÓN NA REALIZACIÓN DOS TRABALLOS RELACIONADOS COA IMPLANTACIÓN DUN SISTEMA DIXITAL PARA O INVENTARIO, XEOREFERENCIACIÓN E XESTIÓN DAS REDES DE SERVIZOS BÁSICOS MUNICIPAIS NO SEU ÁMBITO TERRITORIAL.

Santiago de Compostela,

REUNIDOS

Dunha parte D^a. Ángeles Vázquez Mejuto, Conselleira de Medio Ambiente, Territorio e Vivenda da Xunta de Galicia e Presidenta do Instituto de Estudos do Territorio, no exercicio das facultades conferidas polo artigo 12 e 13.1 do Decreto 244/2011, do 29 de decembro, polo que se aproban os seus estatutos, e en virtude das facultades atribuídas polo artigo 34 da Lei 1/1983 do 22 de febreiro de normas reguladoras da Xunta e da súa presidencia e do Acordo do Consello da Xunta de 27 de marzo de 1991 (DOG de 30 de abril), de acordo co seu nomeamento polo Decreto 112/2020, do 6 de setembro, polo que se nomean os titulares das vicepresidencias e consellerías da Xunta de Galicia, en relación co establecido no Decreto 110/2020, do 6 de setembro, polo que se establece a estrutura orgánica da Xunta de Galicia, co previsto no Decreto 130/2020, do 17 de setembro, polo que se fixa a estrutura orgánica das vicepresidencias e das consellerías da Xunta de Galicia, e co establecido no Decreto 42/2019, de 28 de marzo, polo que se establece a estrutura orgánica da Consellería de Medio Ambiente, Territorio e Vivenda, que actúa en nome e representación da Comunidade Autónoma de Galicia.

Doutra parte, D. Carlos Calvelo Martínez na súa condición de Alcalde-Presidente do Concello de Arteixo provincia de A Coruña, actuando en virtude das atribucións que lle confire o artigo 21.1 b) da Lei 7/1985, reguladora das Bases do Réxime Local,

EXPOÑEN

PRIMEIRO.- O Instituto de Estudos do Territorio (IET), organismo autónomo da Xunta de Galicia, adscrito á Consellería de Medio Ambiente, Territorio e Vivenda, foi creado pola Lei 6/2007, do 11 de maio, de medidas urxentes en materia de ordenación do territorio e do litoral de Galicia, en virtude do mandato recollido na Lei 10/1995, do 23 de novembro, de ordenación do territorio de Galicia.

Ambas as dúas leis foron derogadas pola vixente Lei 1/2021, do 8 de xaneiro, de ordenación do territorio de Galicia, que no seu capítulo IV regula o Instituto de Estudos do Territorio como organismo autónomo adscrito á consellería competente en materia de ordenación do territorio e co obxecto de analizar, estudar e asesorar en materia de urbanismo e ordenación do territorio.

Os Estatutos do IET foron aprobados polo Decreto 244/2011, do 29 de decembro, e modificados polo Decreto 14/2017, do 26 de xaneiro, polo que se aproba o Regulamento de ordenación da información xeográfica e da actividade cartográfica de Galicia, exerce, entre outras, as seguintes funcións:





- Realizar traballos de investigación, análise, estudo e difusión sobre urbanismo e ordenación do territorio, e en particular, o impulso da cooperación con todas as administracións públicas con competencia no territorio, especialmente coas administracións locais, co fin de promover o desenvolvemento de políticas comúns, debidamente coordinadas e programadas, que aseguren o cumprimento dos fins de protección, xestión e ordenación anteriormente sinalados.

- Prestar asistencia e asesoramento aos concellos de Galicia para a elaboración do planeamento urbanístico e a xestión e execución do planeamento, co fin de implementar as políticas de paisaxe na planificación urbanística e territorial.

- A recompilación e o tratamento da información do territorio galego, así como a produción cartográfica para as diferentes consellerías e organismos públicos da Comunidade Autónoma de Galicia, especialmente en materia agraria e de desenvolvemento rural, o que inclúe, en particular:

- Coordinación e difusión da información xeográfica e cartográfica necesaria para o desenvolvemento dos estudos territoriais e urbanísticos das diferentes consellerías e organismos públicos da Comunidade Autónoma, así como o apoio técnico á difusión e formación de actuacións en materia de información xeográfica desenvolvidas pola Xunta de Galicia ou en coordinación con ela.

- Xestionar os sistemas de información corporativos vinculados ao territorio a partir das bases de datos cartográficas e espaciais existentes na consellería e no resto dos órganos da Administración xeral e entidades do sector público autonómico de Galicia que así o demanden, así como calquera outra información que se poida localizar sobre o territorio e que sexa susceptible de ser incorporada coa súa referencia xeográfica para a xestión da Infraestrutura de Datos Espaciais de Galicia (IDEG).

- Incentivar a innovación, a adopción e o desenvolvemento de tecnoloxías e infraestruturas propias no campo de información xeográfica do territorio galego. Así mesmo, abordarase a planificación e o desenvolvemento de servizos de valor engadido e de novos sistemas e aplicacións en materia de información xeográfica para Galicia.

SEGUNDO.- Que segundo establece o artigo 25 da Lei 7/1985, reguladora das Bases do Réxime Local, o Municipio exercerá en todo caso como competencias propias, nos termos da lexislación do Estado e das Comunidades Autónomas.

Que o concello de Arteixo require dun soporte e asesoramento técnico que lle permita acadar a información xeográfica e cartográfica completa para poder localizar e incorporar a un "Sistema de Información Xeográfica" (de agora en diante SIX) específico para as infraestruturas que configuran os servizos básicos municipais (abastecemento, saneamento, subministración eléctrica, transporte....) coa finalidade de que sirva como ferramenta para unha xestión sinxela, veraz e eficaz acorde a demanda actual dos sectores económicos e sociais que desenvolven a súa actividade no territorio municipal.

TERCEIRO.- O alto desenvolvemento e os avances que se están producindo no campo das tecnoloxías da información ofrecen unha oportunidade para avanzar na adopción de novos sistemas, na modernización e integración dos procesos e na explotación da información para unha xestión integral máis eficiente dos servizos municipais do





Concello de Arteixo co SIX que se pretende facer. Por outra banda, dispoñer dun sistema para unificar e compartir a información destes servizos entre as diferentes Áreas do Concello de Arteixo melloraría sensiblemente a coordinación e a xestión que prestan.

A integración de todos os datos e sistemas relacionados cos servizos municipais obxecto deste Convenio supón un reto de innovación e investigación, que o Concello de Arteixo está interesado en realizar.

Por ese motivo, o Concello de Arteixo solicita o apoio técnico do Instituto de Estudos do Territorio para elaborar unha "Estratexia de Dixitalización e Innovación en materia dos servizos municipais", coa finalidade de desenvolver os seguintes obxectivos xerais:

- Organizar e adecuar de forma eficiente os recursos tanto tecnolóxicos como humanos implicados na xestión dos servizos municipais que presta.
- Ampliar, centralizar e unificar toda a información vinculada coa xestión destes servizos
- Potenciar a dixitalización e consulta da información a través de medios electrónicos.
- Facilitar a coordinación entre os profesionais dos diferentes organismos e áreas que interveñen na xestión municipal do Concello de Arteixo que demanden ou aporten información con os servizos municipais involucrados no futuro SIX.

A "Estratexia de Dixitalización e Innovación en materia dos servizos municipais" permitirá, ademais, poñer ao dispor dos cidadáns gran cantidade de información estruturada, tanto de interese xeral (datos dos trazados das infraestruturas, zonas de dominio público e de protección das instalacións, liñas límite de edificación, estado da infraestrutura, inventarios de equipos, ...) como particular (estado de tramitación de expedientes de autorizacións, sancións, expropiacións, incidencias.....), mellorando a transparencia, aforrando custos e tempos de xestión ás persoas e optimizando os recursos do Concello de Arteixo.

Ademais, a antedita estratexia dixital poderá estar aliñada coas actuacións previstas no futuros plans e melloras de modernización que o Concello de Arteixo demande nun futuro y si é o caso no eido de colaboración con outras administracións ou organismos públicos.

En todo caso, o Concello de Arteixo é consciente de que, para que unha estratexia de transformación dixital como esta teña éxito, debe de ser aceptada e adoptada polo conxunto do persoal que deberá empregar as novas ferramentas e, para iso, é imprescindible que todas elas supoñan unha mellora evidente en termos de eficacia (realizar de forma segura e fiable as accións necesarias) e eficiencia (realizar as accións necesarias consumindo para iso a menor cantidade de recursos que sexa posible).

É dicir, que debe percibirse, de forma clara e evidente, unha mellora, en termos de sinxeleza e rapidez, no emprego das novas ferramentas, en comparación cos anteriores métodos de traballo. Por tanto, todas as accións que forman parte desta estratexia dixital que quere emprender o concello de Arteixo deberán de cumprir, en primeiro lugar, esa premisa.





CUARTO.- Tanto o Concello de Arteixo como o Instituto de Estudos do Territorio, están de acordo en establecer unha colaboración nos campos de interese común.

QUINTO.- O artigo 57 da Lei 7/1985, do 2 de abril, reguladora das bases do réxime local e o 194 da Lei 5/1997, do 22 de xullo, reguladora da Administración local de Galicia determinan que a cooperación económica, técnica e administrativa entre a Administración Local e as Administracións do Estado e das Comunidades Autónomas, tanto en servizos locais como en asuntos de interese común, desenvolverase con carácter voluntario, baixo as formas e nos termos previstos nas leis, podendo ter lugar, en todo caso, mediante os convenios administrativos que subscriban.

A colaboración ou cooperación consistirá na participación conxunta e efectiva no desenvolvemento da actividade común, mediante achegas de traballos de organización, medios persoais e materiais ou calquera tipo de recursos para a finalidade compartida, de acordo coas respectivas competencias, e será sempre diferente das estruturas contractuais onerosas reguladas na lexislación de contratos do sector público.

Para conseguilo as entidades participantes consideran moi útil definir un marco de colaboración institucional e acordan formalizar o presente convenio de colaboración, de conformidade coas seguintes

CLÁUSULAS

PRIMEIRA. OBXECTO

Este convenio de colaboración ten por obxecto establecer as pautas de colaboración entre o Concello de Arteixo e o IET, no marco dos traballos competencia do primeiro, que demandan os coñecementos e experiencia contrastados do segundo nos acordos e tarefas que servirán de apoio ás actuacións para desenvolver toda a información mediante un SIX integrado coa información relativa ás redes de servizos municipais e das demais Administracións Públicas, no ámbito municipal, partindo da situación actual e avanzando a medida que se vaian desenvolvendo os traballos de dixitalización e estruturación de información que se consideren necesarios e axeitados para os obxectivos desta estratexia de dixitalización e innovación sinalados no punto TERCEIRO deste Convenio.

Polo exposto, a finalidade é a de dispoñer dunha ferramenta unificada SIX, que aglutine toda a información xeográfica relacionada cos servizos públicos no termo municipal e que sirva, ao mesmo tempo, como un instrumento de traballo útil para o persoal do Concello de Arteixo involucrado na súa xestión e que sirva como un punto de consulta de información para o conxunto da cidadanía, que simplifique os seus trámites co organismo xestor destes servizos de titularidade municipal.

SEGUNDA. COMPROMISOS DO IET

O IET, asume os seguintes compromisos no marco deste Convenio de Colaboración:

1. Asesoramento e apoio aos traballos de análise e planificación no eido da información xeográfica correspondentes as infraestruturas de saneamento, abastecemento ou afíns do Concello de Arteixo.





2. Facilitar e coordinar a información necesaria para a planificación así como o apoio ao Concello de Arteixo, de selo caso, na difusión da información mediante un SIX integral destes servizos.
3. Facilitar a nova información de tipo xeográfica e territorial froito dos traballos e ferramentas que se desenvolverán dentro deste convenio ao Concello de Arteixo.
4. Colaborar na elaboración de pregos e normas técnicas que sexan necesarios para o Concello de Arteixo, coa finalidade de que se establezan os estándares e formatos que debe cumprir a información xeográfica, cartográfica ou de similar natureza acorde a demanda actual de compatibilidade nacional e europea.
5. Colaborar na xeración e catalogación de información xeográfica histórica, si é necesario, do Concello de Arteixo en función das disponibilidades e recursos existentes.
6. Asesorar nos procesos de avaliación técnica, informes e dirección técnica, de ser o caso, dos posibles contratos de servizo que estime oportunos o Concello de Arteixo, ou de participar en calquera outro proceso administrativo, que demande a necesidade dos servizos do persoal técnico do Instituto de Estudos do Territorio.
7. Exercer a coordinación, supervisión, e seguimento dos traballos e estudos obxecto deste convenio, a cuxo efecto o IET a través do seu Departamento Técnico de Estudos, designará uns/unhas técnicos/as con capacidade de decisión, que dirixirá/n e supervisará/n os traballos a desenvolver dentro do marco deste Convenio de Colaboración.

TERCEIRA. COMPROMISOS DO CONCELLO DE ARTEIXO

O Concello de Arteixo asume os seguintes compromisos no marco deste Convenio de Colaboración:

1. Planificar, organizar, promover e impulsar a realización das actuacións previstas na cláusula primeira deste pacto.
2. Dirixir e fixar os criterios para a realización dos traballos e estudos obxecto deste convenio, a cuxo efecto designará o persoal técnico que considere oportuno, para formar parte do equipo/s de traballo sinalados no presente Convenio de Colaboración.
3. Facilitar toda a información necesaria para a planificación, elaboración e posta en servizo do SIX que recollerá os servizos municipais que se citan.
4. Realizar os traballos de tratamento da información necesaria para a súa incorporación as ferramentas do sistema de información xeográfico segundo as indicacións técnicas do IET.
5. Facilitarlle ao IET directamente ou a través de terceiros, se é o caso, a información da que dispoña o Concello de Arteixo relativa ao inventario, aplicacións informáticas e todo aquilo que se considere de interese para realizar a avaliación xeral de situación dos servizos públicos que presta coa finalidade de facer unha diagnose de funcionamento.
6. Contratar todos traballos que no seu ámbito sexan necesarios para a determinación precisa dos servizos obxecto do presente convenio.





7. Facilitar ao IET a información xeográfica actualizada con periodicidade anual das accións realizadas por parte do Concello de Arteixo que supoñan un cambio nos servizos municipais ou de calquera outra capa de información producida que poida coincidir na súa afección.

CUARTA.- RELACIÓNS LABORAIS

A subscrición do presente convenio non implica relación laboral, contractual ou de calquera tipo entre as partes, de tal modo que non se lle poderá esixir responsabilidade algunha, nin directa, nin indirecta, nin subsidiaria, polos actos ou feitos ocorridos durante a execución das actuacións e/ou a vixencia do presente convenio.

QUINTA.- FINANCIAMENTO

O presente convenio non comporta a asuncións de compromisos económicos por ningunha das partes asinantes.

SEXTA.- VIXENCIA

Este convenio terá vixencia ata o 31 de decembro de 2023 dende a data da súa sinatura.

Antes da finalización do prazo previsto no parágrafo anterior, os asinantes do acordo poderán acordar a súa prórroga por un período adicional dun ano mediante unha addenda ao acordo.

SÉTIMA.- PUBLICIDADE E REXISTRO

Este convenio será inscrito no Rexistro de Convenios da Xunta de Galicia regulado no Decreto 126/2006, de 20 de xullo, e será obxecto de publicidade dando as partes asinantes o seu consentimento para incluír e facer públicos os datos persoais que consten no acordo e mailo resto de especificacións contidas no mesmos nos termos do artigo 15 da Lei 1/2016, de 18 de xaneiro, de transparencia e bo goberno de Galicia e en concordancia cos artigos 14 e seguintes da Lei 19/2013, do 9 de decembro, de transparencia, acceso á información pública e bo goberno.

OITAVA. PROTECCIÓN DE DATOS DE CARÁCTER PERSOAL

As partes asinantes obríganse ao cumprimento do Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos), así como da Lei 3/2018, de protección de datos de carácter persoal e da garantía dos dereitos dixitais e demais normativa vixente de aplicación en cada momento en materia de protección de datos.

NOVENA.- COMISIÓN DE SEGUIMENTO

Coa finalidade de asegurar o cumprimento deste convenio, facilitar o seguimento da súa execución ou coñecemento de calquera cuestión sobre a súa interpretación, modificación, efectos ou a súa resolución, créase unha comisión mixta, que estará integrada por:





Por parte do IET: A persoa titular do Instituto de Estudos do Territorio, ou persoa que dispoña para que a substitúa, e unha persoa funcionaria.

Por parte do Concello de Arteixo : A persoa titular do Concello de Arteixo, ou persoa que dispoña para que a substitúa, e unha persoa funcionaria.

O réxime de funcionamento e os acordos da comisión axustarase ao establecido no capítulo II Sección Terceira da Lei 40/2015, do 1 de outubro, de Réxime Xurídico do Sector Público, e na Lei 16/2010, de 17 de decembro, de organización e funcionamento da administración xeral e do sector público autonómico de Galicia.

DÉCIMA.- MODIFICACIÓN, DENUNCIA E RESOLUCIÓN DO CONVENIO

As partes poderán denunciar ou modificar o presente convenio en calquera momento por acordo mutuo. A denuncia por unha das partes do presente Convenio deberá comunicarse por escrito á outra parte con tres meses de antelación á data na que se vaia a dar por finalizado.

Son causas de resolución do presente convenio:

- a) Por acordo mutuo das persoas asinantes.
- b) Si se producisen circunstancias que fixesen imposible realizar as actuacións previstas no convenio.
- c) Polo incumprimento dos compromisos e das obrigas establecidas no presente convenio, sen prexuízo dos danos e perdas imputables ao causante.
- d) O transcurso do prazo de vixencia do convenio sen terse acordado a prórroga deste.
- e) Por decisión xudicial declaratoria da nulidade do convenio.

DÉCIMO PRIMEIRA.- XURISDICIÓN E NORMATIVA APLICABLE

O presente convenio ten natureza administrativa e rexerese pola Lei 40/2015 do 1 de outubro, de réxime xurídico do sector público e pola Lei 5/1997, do 22 de xullo, de Administración Local de Galicia.

As cuestións litixiosas que poidan xurdir na interpretación ou incumprimento das obrigas que se deriven do presente convenio, e que non puideran ser dirimidas pola comisión de seguimento creada a tal efecto, resolveranse pola xurisdición contencioso-administrativa, na maneira regulada na Lei 29/1998 da xurisdición contencioso-administrativa.

En proba de conformidade asinan o presente convenio.

Ángeles Vázquez Mejuto

Carlos Calvelo Martínez

Conselleira de Medio Ambiente, Territorio e
Vivenda e presidenta do Instituto de Estudos
do Territorio

Alcalde-Presidente do Concello de
Arteixo

